

元和郡縣志卷十八

唐 李吉甫 撰

河東道 五

忻州 定襄下

開元戶一萬四千三百三十八 元和戶四千二百四 鄉二十八 鄉二十九

古并州之域春秋時為晉地戰國為趙地秦為太原郡地今州即漢太原郡之陽曲縣也按漢陽曲縣在今州東四十五里定襄縣理是也後漢末大亂匈奴侵邊自定襄以西盡雲中雁門之間遂空曹公立新興郡以安

元和郡縣志 卷十八 一

集之理九原即今州是也後魏宣武帝又于今州西北十八里故州城移肆州理此因肆盧川為名也隋開皇十八年改置忻州因州界忻川口為名也大業二年省忻州義旗初又置新興郡武德元年廢郡復置忻州二年陷劉武周四年武周平依舊置忻州

州境 東西北西八十六里

八到 西南至上都一千七百四十里 南至東都一千七百四十里

南至太原府一百八十里 西至嵐州二百四十里

東北至代州一百六十里

貢賦 開元貢賦 麝香 扇十五枝
布 麻

管縣二

秀容 定襄

秀容縣 上郭下

開元戶七千一百三十八 鄉十一

本漢陽曲縣地屬太原郡後漢末于此置九原縣屬新興郡後魏莊帝于今縣東十里置平寇縣隋開皇十八年于此置忻州又于今縣西北五十里秀容故城移後魏明元所置秀容縣于今理屬忻州國朝因之

元和郡縣志

卷十八

二

滹沱水在縣東三十二里

定襄縣 上東至州四十五里

開元戶五千五百三十二 鄉十七

本漢陽曲縣屬太原郡黃河千里一曲縣當其陽故曰陽曲後魏末移陽曲縣于太原界仍于此城置定襄縣屬新興郡高齊省武成帝移平寇縣于此隋開皇十年移平寇于崞城今代州崞縣是也武德四年分秀容縣于漢陽曲城重置定襄縣

聖阜今名聖人山在縣東北二十里石上手足跡猶存

滹沱水西自秀容縣界流八

代州 雁門中都督府

開元戶一萬五千七十七 鄉二十八
元和戶二千一百二十 鄉四十

古并州之域春秋時為晉地戰國時屬趙史記曰趙襄子與韓魏共滅智伯分晉地則趙有代勾注之北今按勾注在州西北三十五里雁門縣界西陁山是也秦置三十六郡雁門是其一焉漢因之後漢末匈奴侵邊其地荒廢周宣帝大象元年自九原城移肆州于今理隋開皇五年改肆州為代州大業三年改為雁門郡隋氏

元和郡縣志 **卷十八** 三

喪亂陷于寇境武德四年平代置代州都督府

州境 東三百二十里
南三百二十里
西三百二十里
北三百二十里

八到 西南至上都一千六百里
南至東都一千三百里

東南取崩石嶺至恒州五百四十里
西南至嵐州三百里

東北至朔州一百二十里
西北至蔚州四百二十里

貢賦 開元貢 鵬翎五具 麝香
賦 布 麻

管縣五

雁門 繁峙 五臺 唐林 崞

雁門縣 上郭下

本漢廣武縣地屬太原郡後漢改屬雁門郡隋開皇三年罷郡縣仍屬肆州後改肆州爲代州縣屬不改十八年改廣武縣爲雁門縣蓋避太子之諱也國朝因之夏屋山在縣東北三十五里史記曰趙襄子北登夏屋誘代王使廚人操銅料擊殺之遂有代地

勾注山一名西陁山在縣西北三十里晉咸寧元年勾注碑曰蓋北方之險有盧龍飛狐勾注爲之首天下之阻所以分別內外也漢高祖欲伐匈奴不從婁敬之說

元和郡縣志

卷十八

四

械繫于廣武遂踰勾注困于平城謂此地也

河神祠在縣南開元九年并州長史張說奏置

繁峙縣

中西至州六十里

開元戶一千五百九十三 鄉五

本漢舊縣屬雁門郡漢末匈奴侵寇舊縣荒廢晉又置繁峙縣周省隋開皇十八年重置于今縣東六十里大堡戍大業十二年移于武州城聖歷二年以縣在平川難于固守遂東移于今理其城三面枕澗東接峻峽極爲險固

秦戲山一名武夫山在縣東南九十里滹沱水出焉

五臺縣

中西北至州一百二十里

開元戶二千一百六十五 鄉五

本漢慮虜縣

慮音閭
虜音夷

屬太原郡因慮虜水爲名也晉省

後魏孝文帝復置卽今縣理是也屬新興郡高齊改屬雁門郡隋大業二年改爲五臺縣因山爲名也

五臺山在縣東北四十里道經以爲紫府山內經以爲清涼山

慮虜水在縣北十五里

元和郡縣志

卷十八

五

唐林縣

中東北至州一百一十里

本漢廣武縣地證聖元年分五臺崞二縣置武延縣唐隆元年改爲唐林縣

滹沱水在縣東

沙河在縣南二里

崞縣

中東北至州五十里

開元戶二千七百四十八 鄉五

本漢舊縣因山爲名屬雁門郡漢末荒廢晉初又置魏改爲崞山縣後魏宣武帝移雁門郡理此隋開皇十年

移平寇縣十此屬代州大業二年改爲崞縣

滹沱水在縣東二百步

蔚州 興唐下

開元戶四千八百八十七 元和戶一千五百六十三 鄉十一 鄉十二

禹貢冀州之域虞及周屬并州周禮并州川曰漚夷浸曰漑易今漚夷在靈丘漑易在飛狐皆在州境春秋時其地屬晉戰國時屬趙襄子殺代王有其地後武靈王置雲中雁門代郡秦亦爲代郡漢元年項羽徙趙王歇爲代王二年陳餘迎歇還趙歇又立餘爲代王三年韓元和郡縣志

卷十八 六

信斬陳餘置代郡領縣十八東魏孝靜帝又于此置北靈丘郡周宣帝于今理置蔚州隋大業三年罷州置雁門郡武德四年平劉武周重置蔚州

州境 案州境里數傳寫缺

八到 西南至上都二千里 東南至上都一千六百里 西南至東都一千三百里

東南至恒州取方秦嶺山路四百九十里 東南至定州取轆轤山路四百九十里

東南至易州山路三百六十里 西南至代州山路四百六十里

西至朔州二百八十里 北至天成軍一百八十里

東北至媯州界孔嶺關一百里從關至媯州一百

貢賦 開元貢賦 熊皮 豹皮
布 麻

管縣三

興唐 靈丘 飛狐

興唐縣 下郭下

開元戶一千四百七十二 鄉四

本靈丘縣也開元十二年于州東北一百三十里橫野軍子城南置安邊縣屬蔚州天寶元年改爲安邊郡仍自靈丘移州理于安邊城至德二年改爲興唐郡仍改安邊縣爲興唐縣

元和郡縣志

卷十八

七

倒刺山在縣東七十里亦號雪山俗傳靈仙所居與五臺山略等

漚夷河亦曰瓠觚河上槽狹下流闊有似瓠觚因名大韭多生于山及平野魏孝文所種以濟軍需後沃壤處皆長三尺葉廣于馬藺但味少短耳

橫野軍置在州城內

靈丘縣 中下東北至州一百三十里

開元戶二千四百二十一 鄉五

承漢舊縣屬代郡後魏省東魏孝靜帝重置屬靈丘郡

隋開皇三年罷郡縣屬蔚州大業二年省蔚州改屬代州隋末陷賊武德二年又置靈丘縣屬蔚州

太白山在縣南十里山有鍾乳穴其深不測仰望穴中乳如懸穗焉

石銘陁嶺在縣西北八十里上有石銘題言冀州北界故謂石銘陁

隘門山亦名隘口在縣東南十五里壁立直上層崖刺天有石道極險陁後魏明元帝置義倉之所

漚夷水一名漚水出縣西北高是山周禮曰并州其川元和郡縣志

卷十八

八

漚夷謂此也

茲水出縣西枝迴山懸河五丈湍激之聲響動山谷樵棧之士咸由此度巨木淪渚久乃方出或落崖石無不粉碎也土地記云枝迴嶺與高是山連麓接勢

開皇長城西自繁峙縣經縣北七十里東入飛狐縣界趙武靈王墓在縣東三十里

飛狐縣 下西至州一百五十里

開元戶九百九十二 鄉三

本漢廣昌縣地屬代郡後漢屬中山國晉又屬代郡隋

開皇三年改屬蔚州仁壽元年改爲飛狐縣因縣北飛狐口爲名也隋末陷賊武德六年重置寄理今易州遂城縣界遙屬蔚州貞觀五年移還今所

磨笄山在縣東北一百五十里趙襄子姊爲代王夫人襄子旣殺代王迎其姊夫人曰以弟慢夫非仁也以夫怨弟非義也磨笄自刎百姓閔之爲立祠

倒刺山在縣東北百二十里出佳大黃

飛狐道自縣北入媯州懷戎縣界卽古飛狐口也酈食其說漢王曰杜白馬之津塞飛狐之口此言皆一方之

元和郡縣志

卷十八

九

阨也又劉琨自代出飛狐口奔于安次亦謂此道也

三河冶舊置鑪鑄錢至德以後廢元和七年中書侍郎平章事李吉南奏臣訪聞飛狐縣三河冶銅山約數十里銅鑛至多去飛狐錢坊二十五里兩處同用拒馬河水以水斛銷銅北方諸處鑄錢人工絕省所以平日三河冶置四十鑪鑄錢舊跡並存事堪覆實今但得錢本令本道應接人夫三年以來其勢卽立救河東困竭之弊成易定援接之形制置一成久辰獲利詔從之其年六月起工至十月置五鑪鑄錢每歲鑄成一萬八千貫

時朝廷新收易定河東道久用鐵錢人不堪弊至是俱受利焉

朔州 馬邑下

開元戶六千二十九 鄉十三
元和戶七百二十九 鄉十六

禹貢冀州之域虞及周爲井州之地春秋時爲北狄地戰國時屬趙秦爲雁門郡地在漢卽雁門郡之馬邑縣也史記曰匈奴圍韓王信于馬邑信降匈奴按馬邑卽今州理是也漢末大亂郡遂荒廢建安中曹公又立馬邑縣屬新興郡晉改屬雁門郡晉亂其地爲猗盧所據

元和郡縣志

卷十八

十

劉琨表盧爲大單于封代公徙馬邑後魏都代地屬畿內孝文帝遷洛之後又于定襄故城置朔州葛榮之亂州郡又廢高齊文宣帝又于馬邑城置朔州卽今理是也武成帝置北道行臺周武帝置朔州總管隋開皇罷總管大業三年罷州爲馬邑郡皇朝改爲朔州

州境 東西北九十七里

八到 西南至上都一千七百二十里
東南至蔚州三百八十里

東至蔚州三百八十里
西南至蔚州三百七十四里

北至單于大都護府三百五十里
東北至雲州三百四十里

貢賦

開元貢

白雕翎五

管縣二

鄯陽

馬邑

鄯陽縣

中郭下

開元戶三千六百五十八

鄉十八

本漢馬邑縣屬雁門郡漢末荒廢建安中又置屬新興郡晉又屬雁門郡晉末又廢高齊于此置招遠縣屬郡不改隋開皇三年罷郡改屬朔州大業元年改爲鄯陽縣

元和郡縣志

卷十八

十一

勾注山在縣東八十里

河水在縣西三百里

州城本漢馬邑城也昔秦人築城于武周塞以備胡城將成而崩者數矣有馬馳走周旋反覆父老異之因依而築城乃不崩遂名馬邑

馬邑縣

中西至州三十里

開元戶二千三百八十

鄉五

本鄯陽縣地開元五年分鄯陽縣于州東三十里大同軍城內置馬邑縣建中年間河中節度使馬燧權移州

于馬邑縣焉

桑乾河在縣東三十里

雲州 雲中下

開元戶三千一百六十九 鄉七
元和戶鄉數傳寫缺

禹貢冀州之域虞及周屬并州春秋時爲北狄地戰國時其地屬趙其後武靈王自代至高闕爲塞而置雲中雁門代郡今州卽秦雁門郡地在漢雁門郡之平城縣也史記曰漢七年韓王信亡走匈奴上自將逐之遂至平城爲匈奴所圍用陳平秘計得出是也漢末大亂匈

元和郡縣志

卷十八

十二

奴侵邊自定襄以西雲中雁門西河遂空曹公鳩集荒散又立平城縣屬新興郡晉又改屬雁門晉亂劉琨表封猗盧爲代王都平城後魏道武帝又于此建都東至上谷軍都關西至河南至中山隘門塞北至五原地方千里以爲甸服孝文帝改爲司州牧置代尹孝文帝遷都洛邑改置恒州孝昌之際亂離尤甚恒代之北盡爲丘墟高齊文宣帝天保七年置恒安鎮徙豪傑三千家以實之今名東州城其年廢鎮又置恒州周武平齊州郡並廢又于其所遺恒安鎮屬朔州自周迄隋仍爲鎮

也隋亂陷賊武德四年平劉武周置北恒州七年廢貞觀十四年自朔州北界定襄城移雲州及定襄縣于此後爲默啜所破移百姓于朔州開元十八年復置雲州及雲中縣

州境東西北西一百七十里

八到西南至東上都一千九百九十里

東至幽州城一百二十里

又東至天城軍六十里與幽州分界

西至靜邊軍一百八十里

元和郡縣志

卷十八

十三

貢賦開元貢賦鵬翎五具 布麻

管縣一

雲中

雲中縣中

本漢平城縣屬雁門郡漢末大亂其地遂空魏武帝又立平城縣屬新興郡晉改屬雁門郡後魏于此建都屬代尹孝文帝改代尹爲恒州縣屬不改隋爲雲內縣屬馬邑郡貞觀十四年朔州北界定襄城移于此後爲默啜所破移百姓至朔州開元十八年改置雲中縣屬雲

州

白登山在縣東北三十里

火山在縣西五里山有火井深不見底以草投之則烟騰火發有火井祠

紇真山在縣東三十里虜語紇真漢言三十里其山夏積霜雪

單于臺在縣西北四十餘里漢武帝元封元年勒兵十八萬騎出長城北登單于臺卽此也

元和郡縣志

卷十八

十四

元和郡縣志卷十八